

旭華堂文集



02301

旭華堂文集卷十一

墓誌銘

楊獻廷墓誌銘

獻廷先生既歿之次年其子柱斗以狀來告曰  
吾父之喪將以今臘月八日襄事敢以墓門之  
銘煩吾子嗚呼固陋如予其能爲先生銘哉然  
誼有不得辭者初壬子之役柱斗已三就鄉舉  
旣撤棘先生勉之曰吾年雖已踰耳順自顧尚  
覺可待也天不可強志不可灰爾慎勿以一時  
之失遂廢爾業也柱斗因收召柴李諸君及子

旭華堂文集卷十一

墓誌銘

叔姪兄弟輩日相往來分題角藝時復飲酒歡  
呼縱談今古以爲常而先生益加策勵曾不以  
家務少分其子之心觀者謂楊氏之興庶幾在  
旦暮間而未幾有媳之喪未幾有季子之喪先  
又嘗失其元配凡四亡其長媳而柱斗益不得  
意又以苦讀致多疾而先生遂不及待以至於  
歿嗚呼可哀也已先生之系曰勤曾祖也曰天  
命顯祖也曰維春顯考也配李氏繼曹氏有子  
三女一李出者各冲霄邑庠生卽柱斗也配盧  
氏繼邢氏曹出者各冲雲冲霆先卒所謂季子





喪也有孫男一女三先生爲人狀貌端正識者皆指爲有道君子居家恒自刻苦不逐逐於時亦不爲岸異斬絕之行崇貞間以武生遊於庠將思有以大其用而不見知於有司乃退而業耕牧以自娛平時與父老稱述古昔善事壘壘不倦賓客相過咸能得其歡心而復沉果有爲好義樂施里中賴其力藉其資財以築堡鑿池修橋建廟與夫給朝夕贍妻子者不可一二計每以天下多故爲念至歿猶不忘也先生楊姓諱宏猷太平姚村人生於萬曆三十六年四月初一日歿於康熙十三年十月初八日享壽六十有七啓元配李氏幽室合葬於本村之東銘曰氣和而安又直以嚴哲人之常克勤於己克守以禮傳家之方與其鄉處羣相依倚何德之光佳城勒石我撮其迹萬年之藏

旭華堂文集卷十一

墓誌銘

焦仲杰墓誌銘

甲寅秋焦氏子必濟以博士弟子遊於庠勵志苦讀文名日起所與遊盡一時之選其大父曰仲杰公嘗讀書欲酬所志不偶乃退而以業授其子孫子惺初幼列膠庠爲諸生且有聲而必濟又能所與遊苦讀致名若是于是仲杰公喜樂倍嘗日益勅其子孫孜孜矻矻以讀書爲事益不自覺其年之耄而惟日不足也縣令聞而高其品謂是齒邁德邵允稱人瑞可以式末俗榮都邑矣鄉飲之典將敦致賓之士論無不稱

旭華堂文集卷十一

墓誌銘

三

愜維里黨之議亦僉謂宜然而仲杰公顧獨堅拒不欲就曰吾豈效世俗碌碌藉此爲榮哉旣乃迫之不已因慨然太息曰丈夫不得志於時甘老田畝間得佳子孫奉朝夕足矣奈何以半死老翁趨趨囁嚅爲顯人屈耶終不就嗟乎今鄉里小兒夤緣得一官其所由來旣不可問及剝民贖財褫職歸里偷視息於人間猶且逞威不已自謂其赫赫可以詐愚里人也以仲杰公視之孰榮孰辱孰高孰卑哉柴氏中一曰仲杰公之喪將以今康熙十七年閏三月初六日



啓元配梁氏之壙合葬於太平縣北南相李祖  
塋之次願子爲志之志曰公諱某仲杰其號也  
會祖某祖某父某累葉積德以及於公配梁氏  
繼王氏子一孫一曾孫一孫女一曾孫女二公  
以某年月日生以某年月日卒歲八十七歲旣  
乃銘銘曰有爲其墳有拱其木焦公棲茲過者  
必肅

旭華堂文集卷十一  
墓誌銘

固安知縣雲巖王公墓誌銘

康熙戊午正月十日順天府固安知縣王公卒於官縣人哀之歛金致賻以歸其襯國制卒官者請部給符令所在驛致之公以貧不得請歸後十年始克葬將葬孤汝霖走向公族子奐曾泣而言曰吾父行歸土矣請爲銘奐曾惟公夙昔之好不忘於心痛念先君子與公爲同年兄弟加之宗誼篤密平時相期俱不在小先君子旣賚志以歿公又不幸以不獲竟所施也悲緒中擾不能以文謹掇其生平大槩爲常人所

旭華堂文集卷十一

五

墓誌銘

難者次第之公少有文名爲制舉藝尤奇警動人見賞於知縣事盧公易盧公者閩名士乙未第二人也遊於庠一試食餽試必高等學使者臨校院司道府諸小試凡獎賚舊例同學或不預者公皆取分子之庚子登山西鄉試是科直省試額各減舊額之半山西四十八知名者尤盛而公時少年哀然爲分經之首甲辰改試格需用策論表判會試時議以八股爲浮文欲得士之有經濟實學者試額亦減舊之半而令下及試期僅五月耳公是科成進士其始任固安



也值國有三籓之變特令停計典務爲姑息以悅士大夫不肖者遽謂當乘間求在官之利以言動公公謝曰某昔有先人之戒某才薄何堪爲此畿北諸屬設有屯莊旗丁在縣者以滿職主之縣事涉旗丁滿職與縣令相可否公在官持大體事至必以理屈之皆氣沮而退第顧其屬指公曰彼西人彼西人每歲里下有應事名色啗官吏以金蓋固安陋規也公一切却絕禁之會編審里胥又派金若干將持以進公知之懲其首事而以金換錢百餘緡照令散訖公

旭華堂文集卷十一

墓誌銘

六

旣勵苦操冰蘖聲聞遠近上官咸嘆賞之丁巳以軍興餉匱特舉監科以鼓天下士之尚義者公分校北闡闡中議論囂騰主者意隱有所爲至欲奪分校論文之柄公奮然爭之卒以公所取士冠其榜公居恒孝謹親終時初得出身猶未離寒素而葬祭務極豐腆遂至貸人以佐費曰後卽貴不逮也使吾無他日悔可矣素所爲詩文多散佚不收存者有菊園剝草松石齋集尤喜論制藝言皆確鑿拈一題必有一定之法跡其生平見事之早亦有似乎此嗚呼公今沒

矣公之文章行事昭然在人耳目其可沒哉公諱錫韓字季侯號雲巖世居太平縣賈岡邨曾祖諱世強祖諱自恩考諱登魁以公贈文林郎前妣荆氏庾氏妣郭氏贈皆孺人其先代世系與諸行實俱已詳贈公志中公生明崇貞戊寅十月十七日卒之年四十一歲娶衛氏封孺人衛公諱文科女妾毛氏男汝霖邑庠廩生娶張氏女二今擇康熙戊辰十一月一日葬於焦村北原贈公冢之東嗚呼士之以才自負不見知於世不獲施於當時者由古而來不少矣可勝

旭華堂文集卷十一

七

墓誌銘

嘆哉若公者更不永其年嗚呼是尤可悲也遂銘銘曰公有言矣術無不窮維公之爲斯言將謂天下必道而始通公誠以道矣胡爲乎不潰所成而鬱抑以終世及今矣卽賢聖能必其有所功秩孰爲高卑而才則已克壽孰知脩短而學則已豐百世之下其有誦遺文而訪固安君之懿踪者姑山之麓坎首離趾有高其封是曰我族父之幽宮



訓導關掄秀墓志銘

司訓掄秀關先生諱其才號化之邑北之古城鎮人也先爲邑名諸生當順治之末康熙之初文名震邑中邑生無問老於庠及新入庠者或能文或否無不知有古城關先生每督學使者校試邑士亦無不留意先生之文謂關某太平名士也三歲大比鄉書榜出隣邑生亦相率爲問關先生知名久何以又不與薦也潦倒席帽坐困棘闈人皆爲先生惜而先生都不爲意平居左右里巷溫顏相接及敗闕則必正色理諭

旭華堂文集卷十一

八

墓志銘

之至事屬兩忤或鄰比弗叶或骨肉弗叶輒極意委曲推情義窮詞說期於平息而後已古城烟戶千室市易雜沓情利短長挾私競勝終先生之世邑大夫曾無所追問焉歲順治甲午先生餼於庠蓋三十餘年矣旣貢於廷又越數年乃官西河郡之訓導西河材藪也設科取士之外仍以方便排解爲事士之單寒不能學學不能青其襟及見凌於官吏豪強而不獲直與夫鰥曠不自聊賴者莫不以先生爲依歸卽僚友中間有不平一以太和元氣融釋之乃至軍

將戎行亦莫不倚重者先生經濟設施寧區區  
首藉盤中已哉在官十有餘年罷歸優游里舍  
教子弄孫怡然自得其家居撫視久與析爨之  
猶子卵翼撫摩俾有家室里黨或有以財產之  
故反唇詬語致生乖異者人咸恥之至相語曰  
關先生何如人也彼叔之與姪如何若獨非人  
而今乃爾耶以是姪孫一門依依侍養追慕不  
忘有由然矣剛方之慨感通神明神祠有匪類  
上匾者先生見而斥之應聲墮落時人驚傳以  
爲口舌嗚呼先生可以傳矣先生父希舜郡庠

旭華堂文集卷十一

九

墓志銘

生讀書有志行祖君賞業儒早世曾祖鳳梧慷  
慨尚義家聲漸起高祖仲祥增廣生時邑令甚  
器重之五世祖九經邑庠生詩書之澤所自始  
也六世祖俊始占籍古城者也嗚呼積澤累世  
賢德聿昌豈不然哉先生生明天啓元年二月  
十四日卒康熙四十年十二月十二日享壽八  
十有一配張孺人生天啓二年正月十一日卒  
順治元年二月二十七日享年三十有三繼張  
孺人官孺人焦孺人王孺人子男見瑞歲貢士  
候選教諭官孺人出也立品修行意致頗壯能



不愧先生者孫男長聯陞次捷陞特陞曾孫男  
內樞孤見瑞將以是年十一月初十日襄大事  
先期屬銘銘曰臯比儼然學山文海神居東麓  
哲人斯在忠諫苗裔遥遥生采桂樹崢嶸蘭英  
蓓蕾義撫氣同雲薄千載流峙或遷潛神不殆

旭華堂文集卷十一  
墓志銘

盧虛中暨配胡孺人墓志銘

康熙戊午 詔天下舉博學鴻詞之士將以充  
史局脩 顧問也內外百官紛然各具所知以  
進時襄陵盧虛中先生偶遊都下聞喜楊少宰  
地一松江沈詹事繹堂素稱知先生者卽欲以  
姓名入啓事先生聞之曰丈夫不能自致青雲  
顧爲因利乘便之計耶逃名無小累退食有餘  
閒吾安用此爲也力辭歸先是癸卯丙午先生  
闡卷分校者皆有國士之目已嘗擬元魁高薦  
矣先生蓋志在科第也晚以國子生考州佐亦

旭華堂文集卷十一

十一

墓志銘

聊以謝邑博士耳非其質矣先生幼而穎異旣  
入泮翹然倫輩上灑灑數千言援筆立就尊君  
開如公覘其異常誠之曰吾不欲以愛汝者害  
汝吾上有兩兄雖噪名膠庠而未得一第是汝  
祖之憾也汝其勉之先生念念不忘父訓故念  
念念不忘科第也旣晚不得意自顧頽然乃慷慨  
長歌一切爲度外之行設帳授經問子弟有無  
受教之地不計束修也郡伯修理考院而以邑  
令董其役取先生私家大木數十根用之工竣  
而償其值先生曰吾家世世試此院中後來者



且當不乏吾豈謀利者哉笑却之時人以爲難  
乃至暴客入室旣得其人有司將重治之曰法  
不可貸也先生曰是皆貧無聊情可憐也卒請  
釋之乙亥地震之變所在傾摧城廂萬室幾無  
遺搆余時請急歸省過謁先生他人皆惶遽而  
先生獨夷然不屑以是知先生之有異於人又  
不徒辭榮耽寂已也嗚呼惜哉歿之前一日猶  
從容櫛沐神氣凝然嗚呼先生固精於養生家  
言者抑亦向所謂異人者哉先生諱筠心字曰  
虛中以康熙壬午十月十五日卒距生順治乙

旭華堂文集卷十一

十三

墓志銘  
西六月二十八日年五十八耳其先范陽支裔  
仁輔定居邑之東關數傳至淵父子相繼好義  
樂施明正統中上穀數千石以佐官賑當事義  
之及禮部儒士小泉公栢益拓前緒丕振家聲  
則先生祖也開如公諱爨小泉公第三子尤輕  
財好義勤於施濟二十九里之父老同置匾旌  
其門嘗督課先生以讀書取科第爲事先生於  
此蓋不能無遺憾焉配胡孺人孝慈勤儉爲邑  
里表賢媛而爲先生置妾媵待之以禮尤婦行  
所罕覩者生順治乙酉八月七日以康熙乙亥

四月六日地震告殞享年五十有一子男敬丹  
邑庠廩生力學工文是必能釋前人之憾者今  
將以康熙癸巳十二月十一日舉先生與孺人  
之喪合葬焉禮也乃銘銘曰匪東溟洄亘西崑  
崙奕奕神臯君子作室籍之黃壤覆以白日  
子  
如泉源萬流湧出冠裳根底千章森密永維德  
馨茲石爲質

旭華堂文集卷十一  
墓志銘



例貢拙士衛公暨文孺人合葬墓誌銘

拙士衛公之葬二十八年於茲矣康熙五十六年十一月廿二日子邑治孫極將啓厥封而以其配文孺人耐之先期請志志曰公衛姓瑜名握玉字拙士號也世籍太平之北柴莊始祖安築善開基克昌厥後繩繩振遂爲邑南望族五世祖增生膳高祖壽官吉時曾祖希韓祖依仁父景辰俱以力讀遊泮爲時聞人公在兄弟中行三伯琇入邑庠仲瑄入郡庠公以邑庠入太學維時金昆玉友衣冠濟濟而公之八庠余

旭華堂文集卷十一

十四

墓誌銘

實附驥嘗從同人中見其談吐從容不激不隨有時坐客往復間以諷刺公初淡然若無與旣而間閭徐徐於莊論間以微言中之坐客聽之莫不咨嗟咸傾其雅度之可人也修息之次寄意臨池前代法書頗事向往聘於趙娶於梁文孺人則其繼配也絳之高門義泉文氏爲最而孺人更習其父守備盛華之家教堂室之間勤儉相勗自公兄弟析箸後捋荼蓄租完厥室家公之旣歿尤賴焉孀姑八旬弱嗣七歲所天長往幽居血食尚爾懸懸孺人蓋無日不在愁城

苦海也是以公之葬母夫人之葬前後兩舉不  
豐不儉允屬得體而母夫人齒登耄耋當病棘  
之時家人在側獨以賢孝目之有以也兩就養  
於官所學署則戒以毋過刻府幕則戒以毋苟  
且而其申示之尤親切者則曰淡泊何足慮所  
慮者不安淡泊耳析山多士洪都庶僚咸樂道  
之孺人之內教不旣彰彰哉公生明崇貞五年  
壬申十二月廿一日卒康熙十六年丁巳正月  
五日享年四十六歲孺人生崇貞十四年辛巳  
九月七日卒康熙五十五年丙申七月廿九日

旭華堂文集卷十一

十五

墓誌銘

享年七十六歲子邑治仲兄所生公以爲後孺  
人撫之愛倍常兒以歲貢任陽城縣儒學訓導  
陞江西南昌府經歷候補知縣娶王氏先吏部  
郎中前庚子舉人諱履浩女贈孺人繼王氏原  
同知江南常州府陞知貴州貴陽府迎之子元  
曾女封孺人孫極伯兄長子邑浚所生孺人以  
伯仲兩門各宜取一息爲後故命之另娶杜氏  
而得極以爲孫今爲邑庠生娶李氏處士爲式  
女今擇吉合葬古晉城祖塋之東南庶其長世  
無後艱云爾乃銘銘曰西首晉墟羣飛啞啞彼



君子兮亦云都雅比之碩人風柏之下挹彼汾  
流酌以玉斝願爾同德宋高漢馬天其相之宜  
契吾寫

旭華堂文集卷十一  
墓誌銘

十六

高中玄暨配單孺人合葬墓誌銘

中玄高公之歿未及葬也其配單孺人後一年又歿又八年其子諸生聖基乃謀襄事因以墓門之文爲請王子曰嗟乎邑俗之不中也夫禮天子七月而葬以待同軌諸侯五月以待同盟大夫三月以待同位士踰月以待外姻今喪無所待而動輒數年且數十年甚則子不及葬父孫不及葬祖至有世屢易而停柩在堂恬然視之者親戚不以爲怪士大夫不以爲非也高公夫婦何幸今有葬期也聖基庶可以免乎聖基

旭華堂文集卷十一

十七

墓誌銘

曰吾父母未有過人之行吾不欲飾文以誣之願得子片言志姓名世代子孫使後人知爲某氏之墓而已嗟乎高邑之舊家也余則公之姪女夫也以子壻而志外舅之伯兄敢誣哉按公諱斗樞中玄字也始祖明祿歷五世生萬嘗輸粟賑饑有尚義之旌萬生棟棟生壽官岑岑生散官可憲可憲生省榮寰是爲公高曾祖父四世之親累世厚積修長者之行而公尤深篤不自菲薄嘗爲人解紛息訟平閭閻之情紳士中有能文而好禮者皆樂與之遊處邑以北人皆



知有高公焉娶襄陵處士單公鳴宙女子男二  
長亡次女五孫二曾孫男一女一公生有明  
萬曆己未六月十二日卒康熙己丑七月二十  
六日享年九十一歲孺人生天啓壬戌九月二  
十九日卒康熙庚寅十月初九日享年八十八  
歲嗟乎公與孺人之齒可謂長矣其嗣亦云繁  
衍矣易稱餘慶書頌昌後不忝哉聖墓曰十月  
之十一日葬期也子之言幸無後遂爲志之如  
此因銘銘曰山光拂林以處神人山宅靜好以  
眠二老厥封若堂厥聲孔揚乾坤不朽要之等

旭華堂文集卷十一

十八

壽

墓誌銘

舉人李紹先墓誌銘

康熙己亥之冬李子紹先將歸止乎元堂其兄  
莘臣走向王子元亮掩泣而告之王子曰嗚呼  
紹先吾方期子以中牟桐鄉之業垂名百世爲  
宗族鄉黨交遊光寵今乃俄然將與世別長爲  
地下人也嗚呼紹先今之佻達淺人而享長齡  
者亦不少矣乃以深沉厚重之質如紹先而竟  
不永耶日月不居遂爾及茲嗚呼紹先將復何  
言紹先諱繩武號誠齋字曰紹先世居太平縣  
東之西村祖藻父桔世父樞俱庠生父子兄弟  
旭華堂文集卷十一

十九

墓誌銘

以孝友型家平時尚氣誼多豪舉有彼都人士  
之風紹先生有厚質姿體嶷然兒時見者異之  
旣冠爲文多穎思游於庠試輒有名己卯舉鄉  
試上春官者六次不得第嘗與同人飲酒論文  
或時辨詰蠡起而紹先獨含笑若不相涉偶作  
一語乃復冰解的破使人俛首性尤篤孝世父  
旣沒紹先生甫匝月父卽告主以承嗣事而紹  
先之於父則孺慕終身焉繼母在堂昏晨問視  
殆不殊於毛裏出入作止惟兄之命雖他人之  
謹於事父者不啻也嗚呼斯人也而乃如是人



之爲行當遵何道耶吾聞李氏之先諱讓者嘗  
輸米千百石以佐官賑紹先旣得舉吾意食其  
福者在茲矣而今又如是天之於人竟無心耶  
嗚呼吏治之不古若民生之不見閔於有司所  
在皆然矣使若紹先者天假之年其所就當如  
何而今乃如是將復何言耶嗚呼紹先生康熙  
十四年五月二十九日卒康熙五十六年十一  
月十四日享年四十有三娶張氏舉人世紳女  
生康熙十六年二月初八日卒康熙四十四年  
八月二十二日繼許氏貢士廷桂女生康熙二

旭華堂文集卷十一

三

墓誌銘

十五年十一月二十一日卒康熙五十年九月  
二十五日皆不獲長年不竟所事而亡今繼家  
氏處士惟嫻女生有一女莘臣曰吾兄弟止一  
子弟歿矣而吾又老此子也名而侗願與吾弟  
其之嗚呼余蓋志紹先每一舉筆而泪輒涔涔  
也悲哉遂銘銘曰古天德生今天德死方壯之  
年赴壑之水業發其祥胡促厥齒千秋一慟道  
喪奚悔今也復然悲哉李子我欲問天天則何  
指

庠生張葵一墓志銘

葵一先生邑之賢者也居邑東南隅汾水之濱南王村故其號曰近汾始祖諱先高祖鑣曾祖希孟祖承胤父德政自先至德政張氏之在南王歷九世矣醞釀積累日以益昌至於先生乃以博士弟子發聞鄉國爲衣冠指數推儕輩不可多得之人事父母自問視寢膳奉推几杖而外凡所以撫育子孫保持孤弱辦治家計經營生理者無在不以父母之心爲心鄉人中貧乏不自存者周之惟恐後其小有不叶雀角鼠牙

旭華堂文集卷十一

墓志銘

三

必爲委曲排解令各平其心而後已至有無緩急那貸相濟他人徑執吝惜卽或慕慷慨之名一時相通亦且自以爲德有不覺其詡詡見諸顏色者先生處之直以爲常無足多也嗚呼先生之歿無遠近戚疎人各銜哀雪涕蓋實有以感乎其中矣先生張姓向斗名葵一字也生明崇貞二年四月十八日卒康熙五十二年七月初三日享壽八十有六配趙氏生明崇貞七年七月二十七日卒康熙四十年八月二十日享年六十九歲男慎儀孫長模次楷嗚呼以先生



之德子儀孫模俱不及歿其身而先亡今獨以  
楷孫承重襄大事得無彼蒼有意乎其人將欲  
昌之姑先嗇之乎爲之後者可以奮矣今將以  
五十八年冬仲之念二日舉先生之柩啓趙窳  
合塋焉生順歿寧先生其可無憾乎某先生之  
末親也辱孤孫之託乃系之銘銘曰郟伯之宗  
別則是公有高其封乃望文中問數則蒙考德  
則豐天維理從後將隆隆三鳳八龍秀毓靈鍾

旭華堂文集卷十一  
墓志銘

候縣丞巨圖南墓誌銘

昔在都門巨君圖南携重貲來請以易兩局之制錢余適受命膺巡視之役慮有意外不敢以城寓留君冒爲富人也旣閱月聞其所請已如額遂招賃大車十數輻載之以去君所與偕皆鄉里健少非有老成熟悉道路可與商確利害避就之人也自都至君所旅寓之地尚數十程君率然不爲意竟促車徒長往不顧噫君其曠然大度者耶李臨淮唐中興名將安史之亂每戰必謀定而後從事君外家世習孫吳重權

旭華堂文集卷十一

三

墓誌銘

變不事道德經濟君時又隸運司庠以戎畧爲長技想亦素有意乎臨淮耶不然何其素若有謀視難若易耶使君處臨淮時必有可觀而竟以捐貲卽用之選人終於偶然顛跌之患嗚呼天之於斯人其真無意耶君諱鵬字圖南世太平縣南之史威邨人祖堯通鄉飲賓父國芳太學生候選州判歷世商遊以負耒橫經爲別業然自祖父來則駸駸日向此事矣君少而失母事繼母愛敬不啻其所生異母弟旣長與之析居則一切惟弟所欲無一言稍或不足卽諸父



諸從兄弟亦各親愛不相忤也族黨間或有困  
乏則周之不少吝或有忿爭則勸諭調和必相  
安於無事而後已康熙四十七年及六十年邑  
里屢遭旱荒君極意賑貸終始不倦嗚呼非天  
和翔洽仁心爲質其能如是耶臨淮沉鷺有守  
毅然古良將風而事繼母至孝平昔御下仁厚  
卒之日部下莫不相向垂涕以君之爲人驗之  
寧可少哉君以久不利場屋而改文資余嘗心  
憾焉不料其終不獲展所志耶嗚呼天之於斯  
人其真無意耶君姿格瓌瑋有投筆封侯之槩

旭華堂文集卷十一

二五

墓誌銘

而以國學弟子屈爲縣佐豈其質哉君生康熙  
乙卯二月二十一日卒康熙辛丑十二月二十  
八日享年四十有七娶衛氏子一女一今擇於  
本年十月二十六日葬祖塋之次而其弟卜齋  
爲請銘銘曰生則盤桓成亦蹒跚造物於材亦  
云已難若此君者族亦實繁百室之聚而身則  
單我窺其道前步特寬誰爲沮之竟爾鬱蟠東  
川委折西嶺噴岬此中有人寢斯萬安

郭豫亭墓志銘

猗氏有讀書好古篤行君子郭豫亭先生諱九同字繹及海內學人所羣推爲名解元郭存齋先生難弟也兩先生同母生豫亭後兩歲耳而存齋以已酉領解額旣三十年而豫亭始以已卯庚辰聯捷成進士計先後五十年中皆豫亭屈首抑心盛暑嚴寒燈前月下高誦微吟之日也存齋之言曰有志哉吾不及也夫人苟有志積歲月攻苦而爲之雖濂洛關閩豈足爲難信有志信不可及矣而其性行又大不類時下人

旭華堂文集卷十一

三五

墓志銘

總角入家塾日課視兄稍後焉則頓足而泣必踏其步乃已生平與人都不知有相欺事或有語之欺者第一笑置之橫逆之來絕不與校以爲天下之校橫逆者是亦一橫逆也至父兄妻子之間表裏洞然一以天性行之存齋嘗喟然語諸子曰若翁殆所謂不失赤子之心者乎蓋自其兒時挾書冊弄筆墨歷驗之而云然也需次又十年始選知河南之新野縣新野風雜江楚里民上糧以吏胥包攬爲應然弊竇百出旣下車乃痛革之火耗幫貼裁削幾半焉衙前一



切率稱公務承辦者厚取牙稅以充之亦爲減  
其半邑人洒然若釋重負者歲旱禱雨與紳士  
刻期以待而蒼蒼之表若有司而聽命者至誠  
之動捷於桴鼓也災餘遺黎度不能催科以應  
奏銷之例則更緩其期寬之而戴恩向義者至  
私相稱貸以供截解卒如期得竣事訟牒到案  
雖反覆醜悖閱之咨嗟終不作色或有以佯怒  
爲言者曰吾哀之不暇能怒耶又安事佯爲安  
邑尹重龍逃荒羈居以爭賭殺人廉知其誤爲  
百計免之將去官且脫橐中裝以償舊任之虧

旭華堂文集卷十一

墓志銘

三十六

空郡守愧甚歎曰郭令真長者吾當資之速歸  
耳嗚呼今之官不虧空者幾人哉使人盡如先  
生也天下寧復有虧空哉存齋嘗謂人曰吾弟  
介性完品人多知之其辯訥明鈍剛柔之間能  
不恃其長而善於用者人未必能知也嗚呼彼  
飾詐恣肆以相愚弄侵侮者比比矣先生在今  
日知之者誰耶先生諸子皆承學善文章其家  
狀纖細具備詞繁不殺墓門之石余所爲乃漏  
畧不詳如此後之欲知先生者必求其家狀讀  
之則先生爲人可知矣先生生順治乙酉三月

八日卒雍正甲辰正月七日享壽八旬配荆孺  
人男四女二孫男三孫女五嗚呼先生之世亦  
云脩矣諸子將以今歲十月二十六日葬先生  
於何家莊之東原余忝存齋先生之榜末將肅  
奠於靈次而先爲之銘如左銘曰經說嶽嶽惟  
興敎郭蒲臺踵之如玉出璞載閱其光待茲鸞  
鷲天目峻飛逸行邈邈蟄伏老龍新野奮角道  
以爲治化以昌學友子之名且孺之樂元季二  
方昔賢可作示我典型執筆顏忤千載以還尚  
仰先覺

旭華堂文集卷十一  
墓志銘



貢監張長甫先生暨配柴巨兩孺人合葬  
墓誌銘

嗚呼長甫先生乃葬此耶先生古之所謂善士也少孤不逮事父母事王父母終其身無忤色無間言人皆以爲孝而先生未嘗有孝名諸弟或不幸遇有意外焦然奔走不遑寢食必事息乃已人皆以爲友而先生未嘗以友于兄弟爲名叔父與之析居一切惟命豐嗇肥瘠都無絲髮計較之意卽轉面亦無片語人皆以爲讓而先生亦未嘗以能讓尊長爲名女兄適宋氏而

旭華堂文集卷十一

三

寡迎養在家積五十餘年旣歿而治衾槨周身之具送葬焉里社間有賣薪得銀而失之者如其數予之有牛老而欲殺之以求值者周以財活之諸如此類不一而足人皆以爲世俗之難事鄉黨之義舉而先生但以爲吾行吾心之不能已者耳吾又烏知其爲難烏知其爲義也嗚呼若先生之所爲雖古之善士寧有過乎先生兩娶俱舊家元配柴文學爾棟女結髮相愛當家門最盛之餘酒食歡娛能不失檢取戾爲內外上下之羞生二女繼配巨處士宰女質性溫

茂善氣煦人值先生室中無偶膝下少歡之日  
修行婦道克儉克勤歷二十餘年而得九男三  
女焉嗚呼先生之後亦云夥矣先生生前明崇  
貞壬申五月十一日卒康熙丁丑又三月二日  
享年六十六柴生前崇貞甲戌七月二十六日  
卒康熙壬寅七月九日享年二十九巨生順治  
丁亥六月二十日卒雍正甲辰十一月七日享  
年七十八嗚呼先生夫婦之齒亦可謂修短各  
適矣先生邑中黃里人張姓挺名字子受號曰  
長甫少遊於庠務舉子業頻試不利遂援例入

旭華堂文集卷十一

三九

墓誌銘

國學考州同職其先世俱詳前人志中祖洮化  
前辛丑恩貢叔祖鯨化前明壬戌進士關西道  
副使父濂襟雖列名士籍而慷慨有爲志不在  
小先生承之故能涵育家衆爲羣情所仰也先  
生之孝友義讓卽當身未嘗以爲名而今推之  
爲善士先生其亦可暢然而自得乎夫聖賢之  
業道德之行豈其有大異於人不過以善士克  
之而已在天聞之顧有忝乎嗣君世燦將以今  
乙巳之十二月二十二日襄大事余不佞爲志  
而銘之有如此銘曰長風疾旋難問者天君子



持之休光集焉彼美林立誰招入室英物踵來  
隣嫗笑失大塊蒼蒼聽視惟詳孰夸而獨孰醇  
而汪我與平之善積餘慶天問何爲百世永昌

旭華堂文集卷十一  
墓誌銘

梁廣菴先生墓誌銘

雍正乙巳之歲五月朔日絳之隱者梁廣菴先生卒於家絳人曰是富而能儉不以財自雄者也或曰先生何但不以財自雄亦有禮者也或曰先生之仁厚周物本之天性有急不自濟者羣賴之矣恭而有禮亦以傲侈相形耳非先生之卓然者也或曰先生之卓然者其惟學乎絳之先言學者往往有人然談鋒可畏殊遠道器自冰壑挺出默契道真片言隻語都見要領師承落落遙空孤飛幸免醜類搏擊之傷足

旭華堂文集卷十一

三

墓誌銘

矣誰爲壅西山之薇培柳下之蔭者先生獨流連徘徊不以形迹而以心神孝弟之行孚於里黨儉恭之節風及人羣吾見其自樹則錄道統之淵源也其訓子則集先儒之粹語也嗚呼先生之卓然者其惟學乎維時王子元亮者聞先生歸窀有期方擬撰誌銘於墓道而獨以隱者爲稱或則訝之甚謂先生國學中人也以郡幕上佐列高品選人腰組有日蒞政有時特以例案重疊偶不得值耳先生豈隱者哉嗚呼時人之耳目與先生長者之論說蓋較然不可以相



入矣逸民何班也士師司寇何職也而乃擺脫時俗矯相推附是寧有假借特以飾一日之名云爾乎夫有所見於中也今捐劔普停而踈競之徒猶翹翹懸望不能暫舍且謂卿貳制撫孰非吾曹藉此階以立不世之業何區區短長之足相訾議耶嗟乎先生當成均肄業比闈秋戰時年三十餘耳正仕途進步英少角勝之日苟有心焉郡邑方面唾手可取而皇皇歸省曾無瞻顧是豈以趙孟之貴爲意者哉且訓子以力修實學謂家聲之振不在斤斤科名夫自朝至

旭華堂文集卷十一

墓誌銘

三

野言及振家聲而不鄭重科名者亦何人乎乃先生之見獨有超出尋常萬萬者紆朱拖紫亦不過以此爲弋獲之具而誰是其修實學者據其實而不以名謀其道而忘所遇先生詎有倖心焉而謂非隱者哉或又疑先生且以例邀封典榮乃先人賓飲藉光稱重國論亦時賢之迥出而邁俗之髦士豈遽以隱爲高哉嗚呼聖人之所取於隱豈蕢蓐溺沮之倫哉三代而下知此義者獨一邵康節耳新法之行時賢多投劾而去者康節獨以爲不可蓋天之生人皆非

與世無關者我誠有可爲卽一事一言之有濟  
不敢漠然也我苟不得爲卽祿之天下列之卿  
相不敢安也聖人之所取於隱如是也富而能  
儉恭而有禮仁厚而能周物卽先生之天姿已  
足雖學亦其餘事矣後之學者試以吾言擬先  
生并取所爲行狀年譜者而參較之以隱爲稱  
奚憾哉先生諱萬方字統一廣菴其號也祖某  
父某生卒月日子某孫某今子開宗將以雍正  
之四年月日扶先生之柩與段安人合焉禮也  
遂銘銘曰綠柏森森幕以白日曠茲道山峻堂  
墓誌銘

旭華堂文集卷十一

三

敞域有美淑媛居之且吉君子同歸永卽爾室  
引康成與獻酬招右軍共書帙跨地仙之健步  
表人瑞之靈質千秋後其徐按古哲之懿踪而  
欽茲靜者之特立



衛子猷墓志銘

嗚呼子猷計子之年卽及今日亦僅五十餘歲耳而乃偃然長卧使我垂涕執筆志子之墓耶子猷諱邑治號峯崑我先姑之次乳子先姑丈以弟拙士之未立子也襁褓中卽舉以嗣之而其婦文亦愛之甚篤嘗曰何必身所生乃爲子斯子性行無一不類我真我子也以是母慈子孝自孩提以至成立終身無間焉初入學塾師喜其穎慧以爲非凡兒遊泮之後值時例遂以歲貢作教陽城陞江西南昌府經歷丁母艱歸

旭華堂文集卷十一

墓志銘

三四

方俟擢任以展夙抱而遽告殞也嗚呼悲哉子猷神氣清越謙退善下與人語嘗訥訥如不出口初見之者望其丰采輒訝爲玉人也官陽城時子適遭母喪因迎予妹而過之見其舍中偃隘門道中幾不能旋身而母子老幼貴賤皆適適有自得之色紳士間莫不多之謂學博雖年少真賢者也旣遷南昌以郡幕受知於撫軍監修省會城工督運滇黔兵餉秣陵往來長江上下嘗從星月烟波中度寒暑焉由是能聲藉藉當事皆推轂左右遂以時例得陞縣職需次在

藉姻黨悅之尤樂其天性之和倍爲繾綣予妹  
之歿姪子極哀之不啻其母亦子猷平日和愛  
濡烝之效也嗚呼子猷以子之斤斤自修而不  
承天之佑不獲人之報至平生所最相倚托骨  
肉之親情好之篤老憊殘廢如余者竟不得握  
手長訣一寫夙素遂冥然兩分無復相望也嗚  
呼子猷吾知子之目且不瞑雖天漢逍遙悠悠  
塵壒之表何能不繫懷於棲止之無嘗祝奠之  
未有定主也謂之何哉子猷生康熙十年九月  
二十八日卒康熙六十一年四月二十二日享

旭華堂文集卷十一  
墓志銘

三五

年五十有二娶王氏先吏部公之女繼王氏原  
貴陽知府迎子元曾女 贈封俱孺人側室王  
氏子男果弟洪子今王孺人撫之爲後子女幼  
未受聘孫男咸寧姪極子今立爲孫嗚呼文孺  
人當日兩房各取一息之言豈非天哉何今之  
吏於斯土者前後不相謀而所見適合也固知  
人之百爲天實主之不可易也今卜以雍正五  
年九月十七日啓前孺人之墓而合葬焉天不  
棄人庶其後衍昌而長世乎遂銘銘曰王之館  
甥衛之人英宦學垂聲內外歆榮戢步修程歸



眞玉京令德令名保茲佳城

旭華堂文集卷十一  
墓志銘

三六

尉美圖墓志銘

康熙壬辰之冬尉君美圖抱病既五年至是而  
歿再踰年乙未冬孟而始克葬諸孤之長者既  
襄其事而踵君以逝及今其繼配趙安人將有  
祔葬之舉計其歿至是乃復七年諸孤以墓門  
之石相囑請余叨世姻能不勉事筆墨乎君生  
而穎慧厲志讀弱冠遊於庠承若斗奎章兩先  
生祖父積累之餘翔步成均授職六品推恩父  
母以及妻室俱邀寵命君身家之際可謂榮矣  
念生我者之未及左右承歡每逢誕日杜門謝

旭華堂文集卷十一

墓志銘

三

客知交槩不招延君終身之慕可謂篤矣雖病  
廢積時人事寡涉而喪葬大節不敢苟自寬假  
或至墮失君之所事亦可以拊心自問矣習家  
世勤儉之舊尺布斗粟罔敢輕費出入之間訓  
飭家衆以天物不可暴殄君之於家政亦可以  
率勵鄉里無忝先志矣居心平恕與物無忤接  
謁之間一以坦誠樂易爲主臧獲皆人子無不  
藹然對之君之於斯人亦可謂自然而叶乎造  
化之理矣嗚呼若君者余蓋甚誼之不知彼蒼  
蒼者何以危君之身而速君之化也安人蓋君



之第三娶視君少十八歲而志意老成所育諸子皆能有立而又善事多病之姑凡十數年委曲安慰君之不快又五年舉其家之老少內外憂喜悲歡悉調停而適其可焉嗚呼尉氏之室蓋莫不賴之矣君諱坊字美圖號平海太平縣南之趙康鎮人生順治十二年八月二十日巳時卒康熙五十一年十二月十一日酉時享壽五十八歲由附貢考州同知奉 敕授儒林郎元配張安人生順治十七年六月初五日卯時卒康熙十七年二月二十三日亥時繼配柴安

旭華堂文集卷十一

三八

墓志銘

人生康熙四年七月十七日丑時卒康熙三十三年二月初一日子時繼配趙安人生康熙十二年正月十八日寅時卒康熙六十年三月二十四日未時享年四十九歲俱以君之秩蒙 敕得贈封焉子男四長鍾萃柴安人出所謂襄君之葬而踵君以逝者諸孤將以雍正五年十月初九日午時啓君與張柴二安人幽室合安人葬焉是宜銘銘曰繚公之後埋玉之坵卓然樹德歷種名流醞釀及此以匹好逑同室永保

萬世千秋

咸陽知縣張卜公先生暨配吳孺人合葬

墓誌銘

余不能詩而謬附詩人之列則卜公先生之爲也先生初令關中之咸陽旣解官而久不歸余自闕下被嚴旨入里門思得與先生商確平生備陳得失時留連杯酒以永朝夕因妄爲絕句以促之先生或有聞也故旣歸結社爲詩而以予附之嗟乎今先生旣下世矣流水高山風雅道微邑中容復有探韻者或亦有髣髴先生其人者耶先生張姓諱枚字卜公自咸陽

旭華堂文集卷十一

三九

墓誌銘

罷歸悲太先生麓逸公之不逮養未得一就官舍也故又號瞻麓世太平縣人其先世遙遙已不可考所可知者自先生以上四傳而始定居於今清儲鎮定居祖諱自賢生二子其次候主簿南溪公諱如全子三人長卽麓逸太先生初號尊五諱問政配吳氏仲弟敬吾公諱問善配毛氏兄弟俱勅贈文林郎咸陽知縣其配俱勅贈孺人蓋仲無子麓逸先生以嗣子不可出繼先生故行二特以先生繼之也先生天姿曠邁幼卽穎異多奇尚贈君時語以文章筆墨



之事輒能神解平居孜孜誦習罔或輟廢自經史子集以及稗官雜說旁涉周覽鮮不撮其精要爲文意局迥不猶人所居止間有喧豗戲劇扃門如弗聞卽偶出亦不左右顧其器宇超然里父老類能道之遂以冠軍補諸生已歲試復第一補學生又值例應拔貢承贈君意竟讓其次者乙卯舉鄉試時同考山陰令吳長洲冢宰也先生就謁謂榜中文如子卷幾無與偶今亦第借此爲異時先驅地耳名次低昂無足爲意也癸未南宮之試以王子方若爲元南中人士

旭華堂文集卷十一

四十一

墓誌銘

率喜揚詡爲名高先生聞其所傳誦曰吾聞作亦大類此獨不得一錄名何耶笑而置之其自記所云或其中有所不足聊以自遣抑亦以見天下事之不平者不可勝言而欲以覺一時流輩之參差不慎者宜各自懲其後耶大抵咸陽之治意主便民而民自便之故其在官也郡守每異其歲課之早辦而其去官也擁道泣送至塞路而不得前此無他先生之爲人固自應爾也人知詩道爲吟咏之事而不知皆性情中物也先生性情傲誕傲故不樂委曲周旋而詩以

淡宕自喜優柔不迫見風致彭澤非其人乎誕  
故能放言高論不規規於禮法之中而詩以恢  
詭不倫發其滉洋之思東坡非其人乎若余者  
以褊躁之性遇事乖忤無由可近詩人而何得  
濫附詩人耶先生亦自成其爲詩人已矣汾山  
一集學人必有見之者鳳臺西樓二碑咸人必  
有誦之者謂可以唐宋元明諸詩翁等差其間  
耶而况邑乘之黠染腹笥足徵里甲之攢併經  
綸如見猶爲詩人之緒餘耶先生生順治庚寅  
六月十九日卒雍正丁未六月十九日享壽七

旭華堂文集卷十一

四十一

墓誌銘

十八歲生卒同日亦詩人一奇也先生素健先  
時偶有不快病少瘳試之勉強成字又自喜可  
以少寫懷抱卽易簣前二日猶於廊階上強步  
手書前人畢竟西湖六月中絕句於晡簷固不  
虞其不起也嗚呼傷哉吳孺人廩生諱來聘女  
寬仁識大體十四歲歸先生敬事姑嫜和處妯  
娒於子媳待之尤有道生順治壬辰正月二十  
二日卒雍正乙巳十一月十八日享壽七十四  
歲子男四孫男四孫女五曾孫男一女一嗚呼  
傷哉先生之子今僅兩人耳孫曾而下則大率



瑤環瑜珥欲稱其家兒也先生其鑒念之哉今宿熠兄弟以雍正七年九月二十日合葬先生與孺人於鎮之西北新阡來請銘銘曰古晉舊都抑唐魏之晚也詩宗靖節慮傍於嵇阮也今所崇尚則斯道之關鍵也前郭後張諒吾儕之文苑也畢生爲事而臨沒猶書唐句則心期之宛宛也風華顯然而終難一第或天運之偶蹇也賈郭兩元比肩接踵庶卜夏之與游偃也其歸在斯而名在世吾知其聲聞之遠也

旭華堂文集卷十一

墓誌銘

例監李子潛先生墓誌銘

絳之子潛先生者李姓諱毓秀鄙冰壑先生及門高弟也冰壑嘗言吾門沉毅攻苦無如子潛將來主持斯事不忝師席者獨此人而已冰壑之學精研四子而猶孜孜者更在學庸意以初學入德之門聖神功化之極下學上達尤學者所宜盡心也先生稟承夙教嘗見其抱持舊冊尋味不已案頭本既硃墨點勘一過又別求新本而硃墨之蓋若將與之終身者嗚呼先生於斯事心已良苦矣先生初亦有意制舉業顧所

王侍御文集卷十一

四三

墓誌銘

爲皆求以發明聖諦而於時下場屋中物多格格不相入旣覘之數年遂罷不復爲余嘗語先生當入山獨求所志先生笑而不答第謂山中未必皆可居耳因念絳俗靡麗輕逸尤不近道而以講求斯事又乏夾持並進之人恐且因以壅吾進取之路也嗚呼先生今求於斯事能洒然冰解凍釋者何人耶冰壑之學將遂泯然已乎先生嘗於官中有不得已事而質之於父一日父登廁而先生左右其間忽聞有太息之聲遽委曲中止旣事爲余言而猶悽然泫下視異



母弟溫溫撫愛若惟恐有傷弟固樂其有兄而  
闈內亦忻然若有動也於余家父子弟語學  
事則疊疊相接語世俗則漠如也既久而覺其  
承教請業皆志在榮世無足與於斯道者翻然  
決去旣去而返復諄諄誠以不可曠業意猶不  
能釋然也先生性情醇篤其於師友倫紀之間  
尤足爲人矜式如此先生生順治丁亥十一月  
廿七日卒雍正己酉八月二十四日享壽八十  
有三配王氏繼和氏再繼朱氏今稱未亡人子  
男二女四孫二先生歷世宗派具手志先人文

旭華堂文集卷十一

四四

墓誌銘

字中其出身履歷及平日論著各種書目詳門  
人所撰行述中而余鄙野不文勉步明道之志  
康節也於先生雖不得有其髣髴亦求以不沒  
其實而已今擇以十一月二十一日葬先生於  
絳城之北吉莊祖塋之次啓王和兩孺人之藏  
合焉遂銘銘曰吁嗟彼蒼豈其無意於斯文之  
昌何茲人之終始乃若是其淒涼及門爲不朽  
之計者極其筆以張皇顧運會之無常問世變  
之滄桑我言之謬悠誠不足據地下之精采且  
歷萬世而彌光嗚呼高高者允臧後之過此者

應識爲先生之幽堂

旭華堂文集卷十一  
墓誌銘

四五



同知甯小瞻暨元配楊宜人繼配盧宜人  
合葬墓誌銘

嗚呼此 皇清誥授奉政大夫湖廣岳州府清  
軍同知小瞻甯公埋玉地也公生而英爽承大  
父方伯公累世榮封之後門第赫奕父奉政公  
以順治辛卯副車與戊戌辛丑兩從弟聯翩雀  
起奉政公雖辭榮就約不屑屑祿仕而後起有  
公乙卯又顯名副車與乙丑姪子接踵而起前  
後相輝甯氏之盛雖江左王謝之風流亦無以  
過也而公之出也實以中書舍人入官在政府

旭華堂文集卷十一

四六

墓誌銘

與滿漢大學士學士諸先生朝夕遊處而尤以  
沁州吳文端澤州陳文貞爲知己同官如猗氏  
喬督學子玉襄陵許司銓壯其尤屬莫逆歲月  
推移積俸及期冢宰偶論陞選諸人謂中翰甯  
某其長才當處以劇職若戶刑兩曹乃可旣而  
載掣竟得郡丞至椽屬亦相視太息曰斯人乃  
膺斯職耶彼蒼之于人都不爲意遂如此及抵  
任郡事入手冰解的破大吏知其可與有爲也  
不欲局以一郡而以諸所應爲者槩假之郡屬  
冗邑或有不理仍檄令攝篆取辦一時而公則

處之一若無事者太宜人在署或違和公雖在  
他所恒一呼而至署中每訝其奇而公每皇然  
猶覺有憾也太宜人既厭世公擗踊號慟連日  
夜不絕聲楚人以爲前此之以喪歸者所未有  
也嗚呼公之爲人外和而內剛於人無所不愛  
而初未嘗委曲苟且以就其不義在官御下一  
以嚴爲主而棲止衣食之少有不遂則展轉籌  
念不啻其子弟與上官共事未嘗自見風力以  
觸其忌而亦不屑巧爲之合以聽其所欲爲孔  
子稱列國大夫而獨有取於鄭之國僑由今觀

旭華堂文集卷十一

四七

墓誌銘

之惠人者豈必大遠於人哉後之君子試從而  
驗其所以然當有以知予言之非誣矣孤以行  
狀請銘予閱其中如排骨肉之難育方內之英  
搜渠澗之流則卓卓在人耳目間其鄉之士民  
皆能道之不煩予之贅言也公諱昺軾字小瞻  
號問樵大父諱三翰字林閣以萬曆丁未進士  
官山東布政使父諱鳳翔字信侯公旣授奉政  
大夫贈如公官母楊贈太宜人元配楊氏吏部  
侍郎諱永寧女繼配盧氏襄陵庠生諱文龍女  
俱封宜人楊生有女德事兩親極盡婦職而歸



公後不久卽沒盧雖不逮事奉政公而太宜人尚無恙在岳署公數攝篆鄰邑不得常侍左右朝夕聞視實賴宜人之力居多平生自奉儉約不喜華靡而好施樂與遇老媪嫠婦尤加軫恤嘗傾私蓄並簪珥建橋村南涑水上以通行人至今便之憐二孤冲齡失怙恩勤彌篤然愛而能勞不少姑息數延名士耆儒俾作師傅時加訓迪不使放逸以母道而兼父道者凡十餘年今二孤皆屹然成立翩翩令器而宜人亦遂報命於公矣嗚呼公生於某年卒於某年子四女

旭華堂文集卷十一

四六

墓誌銘

三孫男三嗚呼公生平與予自朝宁之上以及居室之細蓋無所不言今亦第取其大者粗述之餘則公自心知之而予亦心存之以埃異日質之地下已矣二孤卜以乾隆元年十月二十三日葬公於祖塋之側遂銘銘曰搏霄之翼六月遂息追風之足九萬不卽天乎人也數不可必推之以理前車是式影響何常鏡古帝敕公也夙心我則深識方伯昌之源源美秩栽培先模顯允維則幽宮片石千秋共贊

甯孺人墓誌銘

封孺人甯太君者知江南太平縣紫辰翟公垣令配也翟甯皆聞喜名族勝國時翟中丞公繡裳甯方伯公三翰先後爲時名臣紫辰則中丞孫教授公熠子孺人則方伯從子庠士公世名女也孺人生十四年而嫁嫁四十年而寡又五年而喪子又十餘年而歿中間相夫子事舅姑撫教子孫由舅姑而夫而子四舉三年之喪蓋所以周旋乎翟氏之門者形爲疲神爲悴矣今春閏三月之十三日終於內寢孤孫斯涵介其

旭華堂文集卷十一

四九

墓誌銘

從叔育銳以狀來訃且述孺人平日之所以示諸孤者曰吾自來汝家汝曾祖母愛我甚不數年卽以家之巨細事委我夙興晚寐吾勿敢逸也汝曾祖母氣弱善病吾奉藥餌具盤餐罔有缺時今吾且老而汝曹又不幸幼孤吾殆無休日矣又曰汝曾祖父汝祖父接武登科河以東知名士往來無虛日汝曾祖父生平又好客供客之具必潔必豐吾上伺意指未敢或忤也惜汝曹不及家門之盛也又曰汝祖父令太平以病請休上官弗許父老弗忍其去吾力勸之汝



祖父以吾言爲是固辭而歸時膝下惟汝父耳  
期旦夕得一抱孫以娛晚年今汝等幸森森成  
行而汝祖父究不及見汝父又早世今念之徒  
使吾悲也汝曹猶黃口知何時成立也言已涕  
出殆不能止又曰吾婦人也將何以教汝嚴父  
道也慈母道也而今而後慈非所知矣汝曹其  
率吾教吾將執父道以臨汝嗚呼若孺人者可  
易得乎今之高第舊家能以勤率家能舉祖先  
之行以垂示不忘能嚴以立教導子孫於有成  
者幾人也孺人之言可以風矣孺人生順治四

年

旭華堂文集卷十一

墓誌銘

年丁亥五月二十六日歿時壽七十歲男二育  
鑄育鈔女三孫女二婚嫁俱已詳翟公志中公  
歿後連舉五孫斯涵斯沄斯漣斯浚斯滋所謂  
瑤環瑜珥稱其家兒者太平之緒庶其埒燕山  
之桂乎九月十七日諸孤將耐葬孺人於翟公  
之墓余旣與公同鄉舉而公子向又以父執禮  
待余故不辭而爲之銘銘曰詩咏女子以無非  
無儀使女子而有可儀也於其家人詎不宜吁  
嗟孺人婦順母慈以翟則肥以甯則楣幽室同  
之百世是儀

梁母段安人墓誌銘

安人段氏者州同梁君萬方室人也父修職佐郎祥吾公娶於陶生安人陶先朝名臣恭介公喬孫女安人習家訓于歸後事兩世舅姑俱能得歡心舅老而嗜奕每招集同儕對局角勝安人則手治供具必精必潔以娛之姑染沉痾口澁不能語飲食轉側須人安人先意曲承病者所欲輒與心會形勞神瘁蓋六年如一日焉佐州同君生養死喪咸克如禮州同君初治舉子業不得志安人婉詞慰藉州同君患癱左右扶持迄愈乃已既得子五六歲卽令就傳不以愛故廢督課平時教以惟忍惟讓而尤以奢靡漸染爲戒嗚呼婦人之賢富而能儉貴而能勤善教其子克相其夫篤孝於舅姑不忝於家訓嗚呼盡之矣可不謂女中君子者乎安人壽六十九歲生於某年卒於某年子開宗奉父命來速銘曰先安人之喪將以今十月三日襄事墓門片石待先生之文先生旣不棄而許之矣幸毋忽余旣按狀志之因是再三檢閱狀又稱安人平居以布爲衾紙帛不施下體飲食常取粗糲



乃復思漢相國脫粟布被當時獨一汲長孺譏  
之東閣諸賢卽未有不交口贊頌者而嘆今之  
巨室之不然也安人誠女中君子哉銘曰鳳翥  
天闈月耀西崑有慶德門哲婦采繁內則攸尊  
子子孫孫式惟靈萱人亦有言生始福原

旭華堂文集卷十一  
墓誌銘

尉母文孺人墓誌銘

余以丁巳南遊拜若斗尉先生於廣陵之客舍  
時先生從事鹽筴年已踰七十矣神清氣健不  
減少壯與余譚娓娓終日左右或窺余饑疲欠  
伸欲進食先生方更端觸長掀髯快論或復理  
前語綿言不得斷內人既具食命童子再三促  
之不得已然後去余私訝先生壽當無涯而其  
後必昌間以語坐人或漫應之抵今追驗余言  
不虛矣先生之仲子庠士燦其再繼室爲絳州  
義泉村處士新德女文孺人庠士初娶衛繼以

加華堂文集卷十一

五

墓誌銘

柴皆不永其年孺人婉順能事舅姑得其歡心  
庠士旣數失偶呱呱子女顧之愴然孺人子其  
子女其女視身所出無少異庠士爲之顏開庠  
士有樓君卿之長清言雅諛聽者忘倦孺人爲  
治具娛之及病親侍湯藥通宵不寐蓋尤今之  
巨室所難者庠士子貢監坊抱疴經年動止須  
人孺人歿而擗踊號慟哀感左右則孺人母子  
之情可知矣貢監子歲薦鍾萃幼而喪母孺人  
以爲吾孫也吾當撫之珍護特至倍於諸子女  
蓋余聞孺人染病委頓牀褥而家人朝暮展視



抑搔痾痒奔步禱祀大小皇皇者積時如一日  
焉自非慈德之感詎易言此嗚呼女德之懋自  
古難之書傳以來內行不戒以及於父子君臣  
兄弟朋友乃至亡國敗家禍亂相尋而不已者  
比比矣可勝道哉夫前子子也繼母母也鄭莊  
獨非屬毛離裏者乎漢章獨非不屬不離者乎  
顧人亦未之思耳若孺人者曾幾人哉若斗先  
生德足昌後而有孺人爲之子婦貢監引其緒  
築其基歲薦更能以英少之氣充而實之吾益  
以幸吾言之不虛也孺人生於順治丁亥七月

旭華堂文集卷十一

五四

墓誌銘

十七日卒於康熙己丑七月二十一日享壽六  
十三歲男貢監坊考授州同知娶庠生張曇女  
繼庠生柴圻陽女再繼趙維翰女女六一適王  
學海前壬午舉人而毅子一適太學生李佺庠  
生桔子一適貢生許廷桂貢生翰芳子一適太  
學生柴京荃貢監培陽子一適現任潞安府襄  
垣縣教諭趙思植太學生撫子一適鄭溥壬辰  
進士江南華亭知縣明良子孫四長歲薦鍾萃  
娶余兄辛酉舉人中書改朔州學正王燮曾女  
次鍾益娶候選訓導許廷栻女三鍾咸爲堂伯

貢生址後聘文學吳奕媚女四鍾臨幼女一字  
張祖憲鄉魁世紳子鍾萃奉父命來請銘曰繼  
母之喪今十月十五日當祔葬矣先庠士已有  
志母德似未可泯敢以請遂銘銘曰於維淑媛  
秀毓名門壽算旣延令德彌敦慶踵有子育亦  
爾孫佳匹前祔三室並尊天昌乃後永慰幽魂  
旭華堂文集卷十一終

旭華堂文集卷十一  
墓誌銘



旭華堂文集卷十二

墓誌銘

庠士府君墓誌銘

嗚呼公所謂以孝死者與王父之喪葬得日公蚤暮皇皇經營塋務稍閒則藉草卧帷殯之側時十月也地又重溼哀慕在中積勞不息而風寒乘之王父墓未及封而公已長逝矣痛哉免兄弟無所肖似賴王父治家嚴先考暨諸父程督之切幾能自樹先考歿六年而王父遂復見背旻天不弔乃更奪我仲父去也嗚呼痛哉公

旭華堂文集卷十二

墓誌銘

素豐不利拳曲王父旣被病伏牀摩手足每至移時一日憊甚寢食俱廢連數日夜幾不能起平居一出一入奉命惟謹或以小不當被訶對家人左右曾不少慙於色王父開列館置諸子孫其中而委公以家事自賓祭之重以及米鹽瑣屑皆井井乎其有條也免輩自知句讀卽得從先考與叔父揣心制舉二十餘年不闕戶外事者公之力多焉前己丑之亂鄉寧令寄孥於我王父調護之甚力至欲以公委之賊而公不辭事己或有舉之以爲公危者公曰父命也吾

烏知其他嗚呼古之所謂孝者於今已不可復  
得若我仲父其庶幾哉公方面巨口色微赤姿  
體嶷然帶圍可三尺年三十始遊於庠溫中惠  
外不設城府其淑氣所蒸豈惟堂以上門以內  
卽鄉之人無少長皆信愛之田間有事傭者應  
聲而至此其驗矣其與人處初不甚款曲而久  
之愈親或姻友滿坐談諧鋒射公第拈箸含笑  
觀其互勝以爲樂至人以急來卽時乏必委曲  
周之期有以濟卒之日皆垂涕曰善人歿矣公  
王姓太平縣西曹路人諱履源字巨公號星渚

旭華堂文集卷十二

二

墓誌銘

於引禮府君諱守業郭氏孺人之世爲曾孫於  
知事府君諱之慎張氏孺人之世爲孫於貢士  
府君先王父諱庭趙氏孺人之世爲第二子於  
先考舉人府君諱履浩爲仲弟生平寡疾病自  
殞側失調遂不能語三日而卒實先王父之葬  
期康熙丁巳十月廿八日也距生明崇貞辛未  
正月九日年四十有七娶趙孺人邑庠生諱光  
祥女奐同堂兄弟十一人兄奕曾而下公之子  
燮曾次亦第二中辛酉科山西鄉試娶恩選貢  
士張諱鮎化孫貢監挺女繼湖廣新安知縣絳



州趙諱含真子維屏女女適國子監貢監衛衍  
中孫女幼未字擇於康熙戊辰十二月三日葬  
曹路邨西之新阡距王父塋西北二里許將塋  
父兄皆謂奐爲銘嗚呼奐自少愚騃畏先考之  
嚴尤見幸於仲父仲父卒踰十年始卜地而塋  
奐罪也今茲之銘敢復不實以爲羞地下銘曰  
王氏有聞肇維余祖公則克家用張厥宇維公  
其勤左右於父父曰孝哉吾子力苦彼室高吟  
無敢窺戶伯氏旣升有希其武維則成之公事  
場圃維公斯德鄉老胥覩或噉在野公之所拊  
受天之祐

旭華堂文集卷十二

三

墓誌銘

或呻在席公之所咻念茲良厚去茲何怙金渾  
玉璞云歸於土維公斯德亦云終古萬有千載

縣丞府君暨配郭孺人合葬墓誌銘

皇帝御極

三十七年戊寅之九月一日太平縣候選

縣佐王公葬於此元配郭孺人附之其伯兄之子奐曾者爲志曰聞之先人公之生我祖母趙太孺人有異夢兒時嘗鈍坐寡笑言長就學每夜讀至漏盡不休旣遊於庠益發憤下帷手錄先輩大家經書制藝幾千首研求理實講明法度子弟或拈題神思不屬笑曰吾試爲之下筆輒頃刻而就省試久不售援例入國學就順天試計前後戰省闈者七京闈者一俛得俛失戊午之役年幾五十矣乃嘆曰吾自念於此道亦云無負而天乃阨我如是是亦不可以已乎生平與人設城府一以坦誠樂易爲主每喜漢劉寬唐婁師德之爲人父兄前終日怡怡或以小失誚讓視其色愈和以故我王父家政號爲最嚴公侍在左右從無撻詈之加王父及先君仲父旣俱見背歲時享祀賓筵酬贈以逮薪水米鹽家事無鉅細備集一身鷄初唱而起漏三下始就寢食指旣繁身口周張不能無少缺陷求責日至都不爲道子弟各有短長嘗爲掩覆



不使相媿卽下至臧獲對之藹然用是二十年  
來門以內猶不失先人遺矩微公之德未易言  
也嗚呼痛哉叔父旣沒吾父之同胞盡矣所關  
於家門者不小也嗚呼痛哉公諱履沆字子初  
號玉立其先蓋太原派自十三世祖諱翰臣始  
定居太平歷傳至曾王父諱之慎出粟賑饑拜  
爵六級王父諱庭苦志積學爲諸生有聲生四  
子公於兄弟次爲第三以故明崇貞癸酉七月  
二十六日生以康熙甲戌八月十五日卒享年  
六十有二郭孺人太學生萬年女御史萬里姪

旭華堂文集卷十二

五

墓誌銘

女貞慈有女德能相夫子以順於舅姑以不戾  
於骨肉以故明崇貞辛未三月初六日生以康  
熙辛亥二月二十六日卒享年四十有一繼屈  
孺人邑庠生履泰女子男五人奭曾候選訓導  
娶衛氏庠生文浩女繼盧氏錦屏女奭曾增生  
娶衛氏增生爾肫女繼李氏呈祥女英曾候選  
縣丞娶張氏庠生陞黻女繼張氏陞辭女巽曾  
娶屈氏掄升女契曾娶盧氏候選訓導燦女女  
三人一適戊午亞魁李洙一適候選訓導盧爾  
儁一適現任忻州訓導衛衍中孫男二人佶聘

衛氏噫女做幼奐曾嘗從左右竊窺公之存心  
慈恕真有人所難能者自非橫逆之來蓋未嘗  
有盛怒焉仁者必壽竟何據耶嗚呼痛哉遂銘  
銘曰門祚之故職維人持之以與會有因公於  
斯時示之身協氣流兮謂宜馴孰不率兮將何  
暝無忘厥初返厥醇庶其永安此室兮萬有千  
載福振振

旭華堂文集卷十二  
墓誌銘



選拔府君暨配趙孺人合葬墓誌銘

我王父有少子而愛之與其次子之子燮曾長子之次子奐曾同齒而生又獨後王父名之曰履湜字之曰子正命與兩孫同受業於諸兄諸兄以其少而愛也不甚加督課而公天姿秀拔所學優然旣壯奐曾已鹵莽躡得一科燮曾每童試輒厭厭儕偶公自顧退詘不勝挹損及爲博士弟子文名頓起試每冠軍當是時王父年日益邁先大夫已棄世矣王父忽忽不樂賴少子有文一番報名一番色喜子孫侍膝下至藉

旭華堂文集卷十二

七

墓誌銘

以爲開顏之具焉平陽太守招三十六庠之士開館授精登場角藝公在其中推爲翹楚王父嘗向之輒然曰吾晚而得汝以爲憂今無憂矣居嘗聲氣交遊及書譜畫苑聲歌裘馬一切雜好性所深嗜顧拘於地僻不得一快其所欲寂寂然旣而奐曾又躡得一第燮曾復策名鄉書時王父亦已棄世矣公乃慨然泣下相謂曰吾三人同齒同入學而君二人者乃俱能取科名副先人之望而吾今如是吾其終於此乎於是下帷發篋手擬心摹益精其業乙丑科試學使

者賞之置之首名餼於庠丙寅遂以選拔貢於  
大學先是公嘗自狹其鄉恨不生通都大邑得  
風雅名通之士與之遊處及入都謂可以廣見  
聞快生平也乃卒無所合而歸歸而刮磨夙好  
務爲經營滋殖之計免會聞而非之訝其行之  
不類己巳三月十二日偶染疾腹脇俱痛遂卒  
嗚呼痛哉王氏有公門望轉覺隆隆欲起今卒  
以不永命也如何嗚呼痛哉公自號敬立生於  
順治辛卯十月初一日卒時年三十九耳配趙  
孺人武舉晉鳳女生於順治己丑九月初八日

旭華堂文集卷十二

八

墓誌銘

卒於乙丑三月初五日年三十有七繼趙孺人  
侯甸女今在室撫子女稱未亡人子男二人文  
曾郡庠生娶屈氏柱女允曾業儒未聘女一人  
適襄陵貢監盧筠心子增生敬丹孫女一幼公  
母氏我王父嘗置之別院王父卒之次年丁巳  
八月六日亦卒今擇於康熙三十七年九月一  
日俱葬祖塋之南去我王父塚十數武而近母  
氏葬公穴之南上令可與王父相望象生前也  
遂銘銘曰麟角鳳毛見云不偶季父之生屬亦  
希有南金在冶和玉初剖謂宜珍家瑞世而胡



以享之不厚天胡錫爾才而靳爾壽意其嗇之  
生前而將以豐之身後耶是未可知也此石不  
朽此封與天地共悠久

旭華堂文集卷十二  
墓誌銘

介休儒學訓導元侯伯兄墓誌銘

伯兄諱奕曾先吏部府君長子貢士府君長孫  
知事府君長曾孫實我高祖引禮府君以來宗  
子也禮宗子必立後宗黨卽親盡者爲之緦故  
我吏部府君之歿我王父命諸父皆杖而謝客  
三年以內不色衣所以示宗統之重我王父之  
意深矣今伯兄歿而無後矣雖老與弟美雖各  
一子敢以私已不後宗子哉伯兄天姿沉敏敢  
任事事至前無戚疏貴賤大小險易輒挺身任  
之委曲周旋至於稱貸求濟雖或負之被以污

旭華堂文集卷十二

十

墓誌銘

名終不悔止嘗曰彼來者其始遽欲負我耶固  
謂我能濟厥事也我卽不能遂逆其後不爲盡  
力是我先負之矣平昔與人論事後言先嘿每  
中理寡聽者莫不洒然心折官介休司訓諸生  
或有訟必先正色誠諭使歸於理不得已而後  
卽訊定其曲直不少假在官十餘年調護訓飭  
不欲使一人不得其意而立會督課詳加評閱  
蓋未嘗一日或惰於職也先任蔚州時庠中有  
魏學謙者賞其文謂當冠晉省雖不幸夭歿所  
言未驗論者以爲知人司銓梁羽辰先生嘗寓



書都下示奐曰令兄才長四應當代能品非苟  
藉盤中人也使得縮符處劇邑當有可觀嗚呼  
伯兄之才所謂囊錐末見亦人皆知之矣官中  
寮友里門父老以及堂階之間鉅細事有棘手  
者無不倚辦莫不推之曰能奐自廢處田野未  
敢輕涉人事卽有強我者猶必審顧再三或且  
中止誠自知其不能也先吏部因已酉之役嘗  
呼奐謂曰爾材劣兄不啻倍今駑幸先馳驥駐  
足耳猶憶省下時奐讀文字三十篇十日而未  
熟兄所讀易義殆百餘首兩日而畢熟誦不遺

旭華堂文集卷十二

十一

墓誌銘

一字鄰邑名下士偶聚而談當入穀者屈指曰  
太平易經一卷奐竊聽之則伯兄名也嗚呼是  
豈偉乎游泮時尙未冠我王父撫其首曰他日  
起我家聲者此兒也縣令盧瑞峯先生試童子  
喜其瞻視不常呼問之語次卽見鋒稜特字曰  
彥志號曰元侯以不志溫飽及壯當封許之也  
嗚呼今天下事眞有人所難言者使我伯兄一  
處其間不知當復如何而乃使伏首寒氈終已  
不獲一試謂之何哉伯兄我前母衛太宜人所  
出順治乙酉八月二十三日其生日也以廩生

援例應 廷試爲歲貢任蔚州學訓導艱歸服  
除補介休學訓導康熙癸巳蒙 恩加一級乙  
未正月自介請急歸二十三日卒於旅次享壽  
七十有一嗚呼痛哉旅次屬纊使我暮年弟兄  
不得面訣一語抱恨曷極嗚呼天乎元配柴氏  
候選州同知柴公培陽長女生順治丙戌十二  
月二十一日卒康熙戊申八月十六日享年二  
十有三繼柴氏培陽次女生順治庚寅六月十  
一日卒康熙壬午五月十五日享年五十有三  
再繼李氏處士弘德女今稱未亡人側室賈氏

旭華堂文集卷十二

十二

墓誌銘

生康熙己酉正月二十日卒乙未二月十五日  
享年四十有七子男何邑庠生娶張氏絳州庠  
生錄女似業儒聘張氏貢監世燦女女一適附  
貢李有孚一適附監鄭雯孫女二俱幼奩嘗聞  
邑人過介伯兄輒有所齋乃有資芥旣竭而指  
介庠以爲無慮者嗚呼伯兄之德又如何耶嗚  
呼宗子有後我高祖以來之祀其長矣伯兄其  
佑之乎兩叔父壽藏之後術者謂其上可爲葬  
地同堂共棲伯兄其安之乎丙申正月十一日  
謹率二子奉靈輻厝於新兆以先後二柴及賈



耐焉免曾謹拜手稽首洒泣爲銘銘曰我父之  
子與父爲體繼繼承承綿我父祀悲哉伯兄胡  
遽至此烈烈其行鄉國之英歿者其身不沒者  
名昌爾令緒山環水滢

旭華堂文集卷十二  
墓誌銘



朔州學正元理從兄墓誌銘

嗚呼從兄之歿忽忽已八年矣母子兄弟橫棺一堂觸目心碎置之不能急之不能不知何以忽忽遂至此也嗚呼傷哉今康熙丙申正月之十一日啓我仲父庠士公幽堂以趙孺人祔之卽於其後爲我兄若弟立新塋而以長兄司訓公爲宗以從兄厝於其右之第一穴地道尚右先儒之說無可疑也從兄諱燮曾字元理號晴軒父庠士公諱履源母趙孺人文學趙公光祥女以順治八年辛卯正月二十日生我從兄方

王侍御文集卷十二

十四

墓誌銘

面巨口體貌端凝兒時長者與之語稍覺有忤輒頭頂俱赤我王父嘗笑謂之曰此兒一斗心也六歲就家塾以世父爲師每日暮罷業輒令同奐暗誦大學須一氣而畢爲勝否則負奐每負則捨常課而數誦大學然終不能一勝也旣長習制藝從世父講先民之業精神脉絡意度波瀾無不極意考求時賢文字不無得失必往復尋繹於章句集註之中求所以得失之故焉二十一入泮二十九食餼三十一薦辛酉鄉書皆以強力積苦致之嗚呼士病不學耳穎姿而



或以終廢鈍質而卒以大成學不學所關豈不較然士苟能學以不穎不鈍之器盡已百已千之功雖身與販夫牧豎爲伍以之神明變化步武先民亦何不可彼孟旋力索維節苦思不悲遲暮而且欲畢十年之力以讀書至於老死而不悔我從兄以中翰改廣文亦謂冷署可以讀書而之官不及二年而遂歿將如昌黎之嘆老嗟卑鬱鬱不舒以殞厥生耶抑天之所以命之者數僅如是止耶抑塞上風土不宜所以自奉有所不適而然耶嗚呼痛哉與兄少而遊戲

旭華堂文集卷十二  
墓誌銘

十五

相得長而筆墨相資形雖雁行情若同體從兄之歿與爲之神氣銷沮筋骨不屬者累日嗚呼天乎大同府朔州學正官署其歿之地康熙四十七年十二月初三其歿之日距生年五十有八元配張氏貢監挺女恩貢鮑化曾孫女生順治甲午三月二十九日卒康熙丁卯二月十九日享年三十四歲繼趙氏處士維屏女湖廣新化知縣含真孫女生康熙辛亥八月二十二日卒丁丑正月二十九日享年二十七歲再繼楊氏處士續女今撫子女爲未亡人子男二仍例

監生娶戴氏汾州府學訓導文明女伊幼女三  
長適歲貢張祖範次適候選教諭尉鍾萃次幼  
孫士顯幼猶憶辛未公車時奩官行人同年張  
惕存爲同官偶過我夜飲與從兄問答甚款而  
是科京江相國爲總裁則惕存之胞兄也榜發  
不第奩快快兄輾然曰幸甚使榜內一掛名則  
彼時相款之跡余終身不得見白矣嗚呼此其  
於得失之際不肯絲毫苟且可知也奩心神貿  
亂不能以次特就所記憶勉爲此志志已爲銘  
銘曰天虐我家亦云已甚置我兄於朔寧之地  
而不竟其任拂拭以往歸也則櫬人亦何辜天  
不可問先德明明其將有待以庇厥蔭耶爾子  
爾孫接武以奮人定天定我言是讖

旭華堂文集卷十二

墓誌銘  
十六



歲貢士元陟五弟暨配衛李兩孺人合塋  
墓誌銘

嗚呼五弟生平所期許樹立事竟若何而今遂將長眠地下作古人耶嗚呼百畝可耕千金可營雖不富不爲貧矣章縫爲階臯比爲緣雖不貴不爲賤矣知非是懼頤指是期雖不壽不爲夭矣而余獨爲之心痛者先人之所以期許弟之所以樹立尚宜遠絕於此而今遂終於此嗚呼五弟豈不傷哉五弟諱獎曾字元陟我叔父縣丞府君第二子也於同堂兄弟爲第五故族

旭華堂文集卷十二

十七

墓誌銘

黨皆以五稱之叔母郭孺人於時旣生有二女一子矣康熙改元之正月八日婉而得元陟爲人軀幹不滿五尺而凡所措畫用意周匝卓有自立之志從師受業以姿力之薄嘗早夜孜孜攻苦課誦不敢苟自誣以名上人旣游於庠爲增廣生奮志磨礪數戰棘闈期得一當而卒不偶康熙壬辰年踰五十倦矣乃乘時例就貢途喟然有終焉之意戚友或以及鋒而用勸之卒不應嗚呼遂終於此也耶哀哉元陟稟氣素弱而膚理又疎雖風雪嚴寒居溫室之中同坐飲

食人皆自若而元陟獨汗流被面性不能飲每  
有燕會曾不能爲賓客舉獻酬之禮平日頗親  
文史喜談論自頃抱病多愁少歡綿歷逾歲日  
進弗衰然余嘗見其神氣清朗揚揚如常時殊  
不料其溘然一朝遽成千古也悲哉歿之日爲  
康熙丙申六月十四距生年五十五耳元配衛  
氏邑庠增廣生爾肫女實我王父胞妹之孫女  
也生康熙癸卯正月二十二日卒丙子十月二  
十四日享年三十有四繼李氏處士呈祥女生  
康熙甲子二月二十九日卒乙未四月二十二

旭華堂文集卷十二

十六

墓誌銘

日享年三十有二男佶邑庠生娶衛氏處士暄  
女次仿業儒元陟以兄齒逾艾尚未立子親率  
之往致官所以奉晨昏此其惓惓骨肉之間尤  
足爲余心愧者次億幼而失母以嗣弟哭之後  
弟婦提抱之若所生然元陟亦可以瞑目九原  
也女字壬辰進士華亭知縣鄭公明良孫歲貢  
博子文忻孫士頤業儒聘候選縣佐巨鵬女孫  
女二今擇十月十八日厝於叔父穴後長兄穴  
左之第二穴舉衛李二匱合焉禮也遂銘銘曰  
姑之麓列新卬嗟茲人茲焉永休念我兄傷我



弟取諸懷以承以繼噫吁哉天何常義不朽子  
孫保之與天先後

旭華堂文集卷十二  
墓誌銘

十九

郡庠元章從弟墓誌銘

此我從弟元章托體魄之地也元章少孤能自立爲此地聞人雖享年不永而所志曠然不屑鄙細有彼都人士之風君子謂其人蓋可與有爲者惜其抱病不善自調遂至殞身抑亦天不我佑數之修短有以限之乎哀哉初己丑春余解官歸里見元章修幹濶步鬣鬣多鬣居然一偉丈夫心甚快之與之言又爽豁明於事理無囁嚅態以爲王氏後來有人當不愧我祖父門第也旣又察其行事剛果而能信於人卽有所

旭華堂文集卷十二

二

墓誌銘  
爲無不成則益以信其人之可與有爲也惜哉元章學爲制藝初涉筆卽清利見者多許其遠到旣孤遂廢然余每閱其試草有疎脫之病無滯塞之病也瑞草先零艷花易落念我手足能不傷哉元章年踰四十三娶僅一女無子嘗聽術者言疑其父選拔公所葬之非地每向余詰問當日何以葬此余傷其意之已迫而不能道其所以然也卒使元章不及立子而歿余過矣余過矣能無憾哉先是元章爲遷葬之計旣得地於始祖塋西北矣以大事未敢輕舉也今屢



驗於術者弟允曾謹以丙申正月之十一日啓  
選拔公及其母與妻之柩而遷焉元章卽從而  
侍其旁此子孫千萬載繁衍安固之基元章其  
亦可釋然而長眠矣乎元章諱文曾父選拔貢  
士諱履湜母趙孺人武舉趙公晉鳳女以康熙  
十年辛亥十月十三日生以五十一年壬辰正  
月二十七日卒享年四十有二元配屈氏處士  
柱女生康熙辛亥九月七日歿丙子十一月十  
日得年二十有六繼賀氏絳州庠生自琇女生  
康熙庚申正月二日歿丙戌正月二日得年二

旭華堂文集卷十二

五

墓誌銘  
十有七再繼李氏處士良璧女生康熙戊辰六  
月七日歿辛卯十月十二日得年二十有四元  
章之歿繼母趙允哀之命允曾請於從兄元陔  
而取其少子僕爲之嗣踰年而殤一女適絳州  
義泉村張科第異時允曾首生之子則元章之  
子也嗚呼元章吾哀汝之秀而不實也乃銘銘  
曰鄉之人多汝思汝行其不爽矣可以有爲而  
不使之爲則罔矣汝魄依父母其毋恟恍矣汝  
與父俱不食其福後必有人焉其與長饗矣斯  
言非以誣石視諸掌矣

例監元衡從弟墓誌銘

王巽曾字元衡先世籍太平縣之德化坊今爲縣北西曹路村人父縣丞府君諱履沆母屈孺人文學屈公肇泰女初孺人之歸我也踰年壬子十二月二十四日元衡生旣而失乳瘦見骨幾不可保孺人憐之及其少卽議以兄掄升女爲婦平日或有過率爲覆匿以故元衡雖從師受業而不竟於學然穎慧多巧思器物之工繡繪之麗目所經見皆不習而自能性尤儉卽有時鮮衣以出皆若不得已然者誦蟋蟀葛屨之

旭華堂文集卷十二

三

墓誌銘

詩如見其人焉嗚呼自我王父之歿我兄弟子姪之中頗慮失學免嘗欲各因其長而就之浪迹輦轂思招元衡北來從吳越之精於繪事者多購近時畫家名譜從容考論學其法度求其意趣以成一家之藝而時事牽擾胸懷作惡迄不暇及罷歸之後察其所爲又敝敝經營奔走場圃之間未見有高士遠致以是知藝成亦未易言也嗚呼元衡孺人之憐汝亦至矣不督汝以學而頻頻欲汝之得名孰知名之及汝適以促汝之生乎哀哉壬辰秋始援監例甲午春正



十二日遽卒距生得年四十三耳初娶卽母舅  
掄升女屈氏生康熙乙卯五月初一日歿辛卯  
四月二十九日享年三十有七繼谷氏處士福  
國女嫁未二年而寡志在堅守而悲元衡之無  
子哀哀以嗣爲請兄弟同議以仲氏元陟之子  
嗣之其名曰億有女一人適例監生盧紹基之  
第三子鉦嗟乎元衡汝年方壯可以承先持門  
戶而胡以遽死乎吾欲問之於天矣乃銘銘曰  
三兄一弟而共五子而汝乃因以有子維兄念  
汝維弟念汝維室中人念汝今而後可以洒然  
長眠而不憂一陌一孟之無處

墓誌銘  
旭華堂文集卷十二

三

張太孺人耐葬墓誌銘

我王父自爲幽室於祖塋之南我王母趙太孺人先葬之更二十二年而王父歿次年丁巳遂並舉元配王母張太孺人合耐焉於今又二十一年矣再繼配王母張太孺人亦從而耐之時康熙戊寅九月一日也其孫奐曾謹爲耐葬之志曰太孺人處士張公希盛女也處士性行淳慤鄉里愛重之趙太孺人旣沒我王父擇能持家計善撫子女者聞太孺人得家教乃迎歸焉旣入室衣粗食淡簡於自奉而夙春秋享祀賓

墓誌銘  
旭華堂文集卷十二

三十四

筵酬贈之需每先事而具旣事而留所餘以待其後不使缺乏王父經理餘日接謁頗煩而諸子若孫內外服用寸絲尺帛幅裳隻舄一切倚辦無內顧憂者太孺人力也太孺人體弱神強勤於操佐雖酷暑嚴寒每先僮婢而起量口作食計時授衣窮日皇皇終不言苦以奐曾失恃最早尤加憐惜幼時常置之左右歸寧往來常隨以行嗚呼痛哉奐曾卽骨朽魂飛猶依依太孺人襁中時也嗚呼痛哉太孺人生於明萬曆乙卯七月十二日卒於康熙壬申六月初五日



享年七十八歲子孫男女婚嫁俱已詳我王父  
志中其不及詳者分載於先大夫先宜人及諸  
父志中今不重志銘曰孰謂無子皆其子孰謂  
無孫皆其孫協所尊事朝昏同厥止永厥祀

旭華堂文集卷十二

墓誌銘

三

衛太宜人祔葬墓誌銘

嗚呼太宜人今將永歸於幽室不孝子卽几筵之奉不及復瞻侍矣痛念太宜人生不獲享一日之安沒而禮文荒畧卒卒以葬攀慕頌號曷維其已傷哉痛哉太宜人我外祖處士衛公所圻第三女爲我先大夫之再繼配于歸時年僅十三先王父嘗稱其有婦道上下進退不受命於姑不敢行我兄弟三人各一母太宜人撫視之無絲髮之間遠戚疏族若以爲皆其所生也辛丑以後先大夫上公車頻不得意太宜人時

旭華堂文集卷十二

三十六

相慰藉了無恨色室中筐篚錡釜以及巾櫛書帙之屬無不潔治位置得所至於衣食操作皆自然而能夙經其手皆有可觀平時不惜作苦積勞之餘元氣虧損加以子女違離觸景神傷風寒一侵蹉跎不救嗚呼痛哉太宜人生於明崇貞辛巳二月初五日卒於康熙戊寅六月初三日享年五十八歲卒時長子奕曾官蔚州儒學訓導次子奐曾官吏部文選司郎中俱不在側獨季子美曾候選州同知侍疾調藥以進靡去之曰我寒症也藥或誤不如勿藥嗚呼痛哉



長婦柴氏繼柴氏俱貢監培陽女妾賈氏次婦  
張氏邑庠國爽女今卒贈宜人季婦衛氏郡庠  
瑄女繼衛氏貢監與閑女女適陽城縣儒學訓  
導衛邑治孫男長何次仔孫女長適衛棟次適  
李有物三四俱未字謹按古三月而葬禮也今  
擇以九月一日啓先大夫之壙祔葬焉銘曰柔  
可則剛不忒母之德金其質和維漆母之室嗟  
何急從茲域紀石刻心惻惻年萬億永終吉

叔母趙孺人附葬墓誌銘

婦人以善持家計爲才而或則不諧其夫不庇其子雖云才乎弗取也我從母趙孺人其庶幾乎我仲父武庠星渚府君性慈和能馭下我王父命之主家計仲父身親農畝與傭者左右出入至夜半被雨歷行溝澮版牘之間困敝泥塗弗顧也孺人心弗善謂翁伯小郎諸兒子輩皆挾書卷弄筆墨而君獨否君能耐耶烈日淒風手胼足胝君獨任受耶仲父嘿然第捧手向王父舍微笑孺人亦笑曰是也晨鼓初鳴伺其起

旭華堂文集卷十二

三

墓誌銘  
爲之添衣夜漏再下俟其歸爲之具食蓋數十年間上代舅姑之勞以成昆弟子姪之業我仲父旣口不言瘁孺人怡然佐之推事量功王氏之室微夫人其與有冀乎孺人生凡五男六女獨育我從兄一人從兄純實不喜事又以王父督課之嚴早暮與文史爲伍閒歸就膝前起居孺人則謂我獨子終日啾唔不休憊矣引置座側旋具糗餌烹甘鮮勞之又惟恐我子之或不逮也撫摩之餘導之就業用是從兄承教力學遂薦賢書年幾五十失偶三娶若女若子婚



嫁之禮皆拱手受成終孺人之世從兄蓋無日不在襁褓中也嗚呼王氏之室今則何如以孺人之才理家政考之戚黨之中不亦僅乎孺人邑庠光祥女視我仲父少二歲少年同室終老相得男燮曾辛酉科舉人候補內閣中書舍人改大同府朔州儒學學正娶張氏繼趙氏再繼楊氏女適忻州儒學訓導衛衍中孫男二長仍次伊孫女三曾孫男士顯嗚呼孺人以前明崇貞癸酉四月初十日生其歿也後我仲父之歿二十五年爲康熙辛巳正月二十七日享年六十有九我從兄未及襄大事而歿今仍已冠婚且抱子矣敬擇於康熙丙申正月十一日啓我仲父之窆而祔焉其伯氏之子奐曾謹爲銘銘曰公於是乎駐母於是乎祔勗哉我後人以攀以慕以矜以顧以式厥步以引厥祚

旭華堂文集卷十二

墓誌銘

五九

叔母屈孺人祔葬墓誌銘

屈孺人者我叔父縣丞府君繼配也元配郭孺人溫慎能相夫子事舅姑生從弟伯仲叔三人及歿伯十三歲仲十歲叔六歲耳其早暮食飲冬夏衫襦我叔父不及悉也孺人旣歸於我一切惟孺人是問當是時夫妻子母歡聚一室我王父以爲諸孫不幸無母今有母矣叔父以爲吾諸子不幸無母今有母矣從弟輩亦皆出入自如忘其身爲無母之人也踰年孺人舉子再踰年再舉子我王父喜見顏色嘗從容謂奩曾

旭華堂文集卷十二

三十

墓誌銘

曰汝曾祖未及抱孫而歿吾今乃已有十孫嗚呼爲人子孫仰念先人之言其所以樂有我者豈徒欲爲國家添丁已乎豈徒欲其倚門第坐享餘資誇鄉里已乎抑亦欲其修子弟之行絕愧怍之端強學發身稍稍有聞爲不朽計也嗚呼念哉乃若婦人不幸而繼室於人前後子女能保無絲髮之嫌乎而或且諱語反脣使鄰里共傳議之彼獨何哉而不肖子又昧於繼母之卽母悍然不顧名義動以爲彼非我之生身者此其人寧得名之曰人而孺人入王氏之門身



親作苦四十四年使諸子授室抱子且弄孫焉  
朝夕團圞欣欣相得不謂之賢母乎孺人邑庠  
肇忝女生明崇貞壬午十一月十四日歿康熙  
甲午十二月十五日享年七十有三子男長爽  
曾增貢任朔州儒學訓導補汾陽儒學訓導加  
一級娶衛氏庠生文浩女繼盧氏處士維屏女  
側室李氏趙氏次獎曾增貢娶衛氏增生爾朏  
女繼李氏處士呈祥長女三英曾例監候縣丞  
娶張氏庠生陞黻女繼張氏處士陞辭女四嬰  
曾例監娶屈氏處士掄升女繼谷氏處士福國

旭華堂文集卷十二

三

墓誌銘

女五契曾邑庠生娶盧氏長治學訓導燭女繼  
李氏處士呈祥次女女長適戊午亞魁李洙次  
適蔚州學訓導盧爾儁三適忻州學訓導衛行  
中孫男長佶邑庠生娶衛氏璫女次倣郡庠生  
娶衛氏例監怪女三仿娶例監張澄襟女四偁  
娶例監柴京荃女五億幼孫女長適例監盧紹  
基子鉦次爲增貢鄭博子煥所聘曾孫男士顯  
聘例監巨鵬女曾孫女二俱幼嗚呼日月不居  
叔父合郭孺人而葬今已十八年矣康熙丙申  
之正月十一日復以孺人祔焉奩曾不斐謹爲

銘銘曰母我者子子我者母何前何後與我父  
爲偶拮据其手痺瘡其口萬年之藏其敢或苟

旭華堂文集卷十二  
墓誌銘





宜人張氏墓誌銘

宜人張氏我外舅庠士公國爽長女我長姑出也先太宜人以辛卯中秋生而得男長姑以壬辰重陽生而得女祖父母念內外兩孫生皆令節謂當爲夫婦就襁褓中呼先大夫及我長姑而命之八九歲時間從母歸寧輒避匿不相見祖父母燕閒或召諸內外孫羅列嬉戲不得已而前已復徐徐去旣長在室從其祖處士公受女孝經卽早暮率弟妹起居於牀前處士嘗從容稱說以爲笑樂性慈和恭順頗有識度余遊

旭華堂文集卷十二  
墓誌銘

三五

泮報至無喜色姑姊妹或強語之一若無聞者因共指目之爲奇及嫁祖父母皆曰吾甥也不與諸孫婦等宜人聞之私語曰兒昔則甥今則媳也獨嘗因祖父疾從諸姑入具飲饌與諸婦稍別耳已酉余倖列賢書祖父呼余小字令前拜賀客客大笑謂若舉人也祖父亦大笑是之宜人不以爲然曰祖呼孫乃亦計及舉人得不使人意滿耶辛亥先大夫卽世余慟不欲生宜人哀泣乘間謂祖父且老不任喪奈何太宜人悲不食則又戒余不當抑哀慰母耶平時事太

宜人甚謹伺顏色爲進退片語不敢忤伯兄他  
出侍嫂病或至終夜不寐初不以爲勞丙辰之  
捷家人無不期余館選者旣罷歸祖父病甚宜  
人轉以爲幸問之曰設得選將不得侍病今免  
此恨矣已午以後余嘗遊齊魯南涉吳越宜人  
不敢望余以衣飾置辦之私余亦未嘗有隻釵  
遺之已巳來京男纔三歲女尚在室乙亥歸省  
則男且就傅女已適人宜人亦未嘗以其故一  
言有加於余也所生四男五女辛勤撫育存僅  
三人前兩男生時卽皆以嗣伯兄怡然無難色

旭華堂文集卷十二

墓誌

墓誌銘

惟伯兄亦嘗多其義嗚呼如斯人乃不獲永年  
耶將余無德以匹之故不獲偕老耶卒之日爲  
康熙丙子三月初六距生時得年四十有五  
年以北邊綏定 覃恩贈宜人子男何今亦  
能識之無矣女長適衛棣次適李有物今擇於  
康熙三十七年九月一日草葬於祖塋乾地柏  
陰之原嗚呼宜人其暫栖焉遂銘銘曰三葉幽  
居遞傳此俱今也從之尚亦無虞毋以生之不  
遂而戚戚其向隅保汝孤訖汝圖吾且選吉而  
與汝偕汝其竣吾



贈孺人王氏墓誌銘

贈孺人衛王氏者王元亮之女弟也元亮父吏部公旣歿而孺人始生母衛宜人心憐之年未笄卽以字今候選知縣衛子猷蓋宜人之族子而元亮仲姑之所出翁拙士公所擇以爲後者也旣嫁室無父家無翁孺人能遵母教順姑意以貞靜婉順聞於戚黨生凡一男一女而皆不肖撫孤姪頗有恩小星在室處之甚適不作流俗婦女忌嫌勃谿之態子猷初官司訓再歷郡幕兩任冗員俱有賢聲孺人實侍行有內助焉

旭華堂文集卷十二

三五

墓誌銘  
嗚呼我先人之家聲孺人可謂無忝矣亦賢矣哉我王氏之嬪於衛四世凡五人我祖姑我姑俱有後而我妹我女遂不秀不實且不永其年使我望衡宇而生悲撫柩捲而增嘔門闌如故馨歎不聞豈不痛哉孺人生康熙辛亥九月二十三日卒康熙壬辰十二月十七日享年四十九有二次年癸巳 萬壽覃恩始有今號嗚呼冠帔生榮吾妹亦可以含笑地下耶今丁酉之十一月廿二日子猷以其母之喪襄大事孺人乃得因而歸土嗚呼骨肉永別豈不痛哉銘曰

仲子執喪行服不忍於姊而聖人過之夫豈不以其禮與然而禮之不可逾天固爲之律情之不能已天亦爲之恤女德可頌彼蒼或不憂憂焉茲地之藏亦孰知子之隱慟焉予又安知夫賢者之行非秉禮君子之所心閱而聖人之所裁非其有甚不能忍者而乃有以成其忍耶悲夫

旭華堂文集卷十二終

旭華堂文集卷十二  
墓誌銘



